

Na osnovu člana 12. stav 1. tačka b) i člana 18. stav 1. tačka b) Ustava Kantona Sarajevo ("Službene novine Kantona Sarajevo", br. 1/96, 2/96, 3/96 i 16/97), Skupština Kantona Sarajevo, na sjednici održanoj 27. aprila 2000. godine, donijela je

## **ZAKON O PROSVJETNOJ INSPEKCIJI**

### Član 1.

Inspeksijski nadzor nad izvršavanjem zakona, drugih propisa i općih akata iz oblasti odgoja i obrazovanja u javnim ustanovama odgoja i obrazovanja (u daljem tekstu: odgojno-obrazovne ustanove) i preduzimanje mjera u skladu sa zakonom i propisima donesenim na osnovu zakona, vrši ministarstvo nadležno za poslove obrazovanja Kantona Sarajevo putem prosvjetnih inspektora (u daljem tekstu: kantonalni prosvjetni inspektori).

### Član 2.

Nadzor iz prethodnog člana odnosi se naročito na:

1. upis u sudski registar i registar ustanova koji vodi ministarstvo nadležno za poslove obrazovanja Kantona Sarajevo;
2. postojanje propisanih uslova za rad odgojno-obrazovnih ustanova;
3. ostvarivanje predškolskog odgoja i obrazovanja, osnovnog obrazovanja i odgoja, srednjeg i visokog obrazovanja, kao i naučno-nastavne djelatnosti;
4. upotrebu odobrenih nastavnih planova i programa, udžbenika i drugih nastavnih sredstava;
5. upis u odgojno-obrazovnu ustanovu;
6. vođenje propisane evidencije i dokumentacije;
7. uvid u javne isprave, opće i pojedinačne akte odgojno-obrazovne ustanove i druge akte koji se odnose na rad organa kojeg kontroliše;
8. opremu odgojno-obrazovne ustanove;
9. primjenu odgojno-disciplinskih mjera prema učenicima, odnosno mjera za povrede dužnosti i neizvršavanje obaveza prema studentima;
10. primjenu zakonskih i drugih odredaba koje se odnose na učenike, odnosno studente.

### Član 3.

Kantonalni prosvjetni inspektor vrši poslove prosvjetne inspekcije u odgojno-obrazovnim ustanovama i to: predškolskog odgoja i obrazovanja, osnovnog obrazovanja i odgoja, srednjeg obrazovanja, specijalnim odgojno-obrazovnim ustanovama predškolskog, osnovnog i srednjeg odgoja i obrazovanja i visokog obrazovanja.

### Član 4.

U vršenju poslova inspeksijskog nadzora kantonalni prosvjetni inspektor je ovlašten naročito da:

1. naredi odgojno-obrazovnoj ustanovi primjenu zakona, drugih propisa i općih akata donesenih na osnovu zakona;
2. zabrani izvršenje nezakonitih odluka;
3. naredi otklanjanje nedostataka prouzrokovanih povredom zakona, drugih propisa i općih akata donesenih na osnovu zakona, odnosno primjenom nezakonitih mjera;
4. privremeno obustavi rad odgojno-obrazovne ustanove u skladu sa zakonom.

#### Član 5.

Kantonalni prosvjetni inspektor dužan je da u toku godine obavi najmanje po jedan inspekcijski pregled po službenoj dužnosti u odgojno-obrazovnoj ustanovi.

Po jedan primjerak zapisnika o inspekcijskom pregledu kantonalni prosvjetni inspektor dostavlja upravnom odboru odgojno-obrazovne ustanove, osnivaču, ministarstvu nadležnom za poslove obrazovanja, općinskoj i gradskoj službi nadležnoj za poslove obrazovanja.

#### Član 6.

Kantonalni prosvjetni inspektor obavlja inspekcijski nadzor u obrazovno-odgojnoj ustanovi po zahtjevu stranke.

U skladu sa stavom 2. prethodnog člana kantonalni prosvjetni inspektor obavezan je da izvrši inspekcijski pregled, sačini i dostavi zapisnik o inspekcijskom pregledu i o tome pismeno obavijesti podnosioca zahtjeva, u roku od deset dana od dana prijema zahtjeva.

#### Član 7.

Pravna i fizička lica obavezna su kantonalnom inspektoratu omogućiti potpuno i nesmetano obavljanje nadzora iz člana 6. ovog zakona.

#### Član 8.

Kantonalni prosvjetni inspektor rješenjem naređuje izvršenje određenih mjera i rok za njihovo izvršenje.

1. izvršavanje obaveze redovnog osnovnog obrazovanja i odgoja školskih obveznika;
2. ostvarivanje prava na školovanje;
3. statusna pitanja učenika i studenata;
4. obavezu javnog isticanja zakonom predviđenih ispitnih rokova i termina, kao i uslova za upis u slijedeći semestar;
5. zabranu rada odgojno-obrazovne ustanove i njenih odjeljenja koja nemaju odobrenje za vršenje djelatnosti;
6. produženje nastave radi ostvarivanja zakonom utvrđenog broja nastavnih dana i nastavnih sati;
7. zabranu daljeg obavljanja ispita;
8. zabranu upotrebe udžbenika i drugih nastavnih sredstava, koja nisu odobrena;
9. zabranu održavanja nastave po nastavnom planu i programu, koji nije odobren.

#### Član 9.

Danom stupanja na snagu ovog zakona na području Kantona prestaje primjena Zakona o prosvjetnoj inspekciji ("Službeni list SR BiH", br. 28/77 i 16/82).

#### Član 10.

Ovaj zakon stupa na snagu osmog dana od dana objavljivanja u "Službenim novinama Kantona Sarajevo".

Predsjedavajući Skupštine Kantona Sarajevo Mirsad Kebo, s. r.

**("Službene novine Kantona Sarajevo", broj 9/2000)**